

**MESUARAT KETIGA, PENGGAL KEDUA,
PARLIMEN KETIGA BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK AHMAD JAZLAN BIN
YAAKUB
[Machang]**

TARIKH : 26.11.2014 (RABU)

NO. SOALAN : 37

Minta **MENTERI KEMAJUAN LUAR BANDAR DAN WILAYAH** menyatakan pihak Kementerian telah mengeluarkan kenyataan ingin mewujudkan Desa Abad 21, sejauh manakah perkembangan mahupun kejayaan yang telah dicapai.

JAWAPAN:

Tuan Yang Di-Pertua,

Di bawah Program Transformasi Kerajaan 2.0 Desa Abad ke -21 (*Government Transformation Programme (GTP) 2.0 – 21st Century Village*), terdapat tiga (3) program yang dilaksanakan oleh Kementerian Kemajuan Luar Bandar dan Wilayah (KKLW) iaitu:

1. *Private Sector Driven* – Projek Ladang Buah/ Sayur Berskala Besar;
2. *Cooperative Driven* – Program Desa Lestari; dan
3. *Youth Entrepreneur Driven* – Rural Business Challenge (RBC)

Projek Ladang Buah/Sayur Berskala Besar

Sehingga kini, sebanyak dua (2) projek di bawah Projek Ladang Buah/Sayur Berskala Besar telah dilaksanakan iaitu di **Projek Ladang Komersial Berskala Besar Agropolitan Chemomoi, Bentong Pahang** dan **Projek Tanaman Nanas di kawasan Pertanian Tuan Seh Sedili Kecil, Kota Tinggi, Johor.**

Projek Ladang Komersial Berskala Besar Agropolitan Chemomoi, Bentong Pahang adalah dipantau oleh Pihak Berkuasa Kemajuan Pekebun Kecil Perusahaan Getah (RISDA) dan syarikat peneraju projek adalah Syarikat Exotic Star Sdn

Bhd yang menanam tanaman betik sekaki dan eksotika di kawasan seluas 200 ekar. Setakat 8 September 2014, fasa satu dan dua seluas 35 ekar telah dituai buah betik sebanyak 65,459 kilogram untuk pasaran dalam Negara. Syarikat juga telah menggaji seramai lima (5) orang pekerja tempatan untuk bekerja di ladang.

Projek Tanaman Nanas di Kawasan Pertanian Tuan Seh Sedili Kecil, Kota Tinggi , Johor pula adalah dipantau oleh Lembaga Kemajuan Johor Tenggara (KEJORA) dan syarikat peneraju projek adalah Syarikat Ergobumi Sdn Bhd yang menanam tanaman nanas MD2 di kawasan seluas 300 ekar. Setakat 23 Oktober 2014, tanaman fasa satu seluas 20 ekar telah dituai buah nanas sebanyak 80 tan dan sebanyak 20 tan juga akan mula dieksport ke Korea Selatan pada penghujung Oktober 2014. Syarikat juga telah menggaji seramai (4) orang pekerja tempatan untuk bekerja di ladang.

Program Desa Lestari

Program Desa Lestari (PDL) dilaksanakan bertujuan untuk menjadikan kawasan luar bandar maju, menarik dan menguntungkan untuk didiami. Sebanyak 42 buah kampung telah dipilih pada tahun 2013 dan 2014 dengan peruntukan yang diluluskan berdasarkan kepada cadangan projek ekonomi yang telah dibentang kepada KKLW.

Antara projek-projek ekonomi yang telah diluluskan adalah **Projek Ternakan Lebah Kelulut yang telah**

dilaksanakan menerusi platform koperasi dan menjana pendapatan sekitar RM500 hingga RM4,000 sebulan. Selain itu, KKLW turut menyediakan peruntukan untuk menaik taraf dan membina prasarana-prasarana pelancongan sedia ada kepada kampung-kampung yang terlibat dalam aktiviti sewaan **homestay** dan **kampung stay yang berjaya menjana pendapatan bulanan yang konsisten antara RM500 hingga RM10,000 sebulan.** Disamping itu, kampung juga diberikan bantuan untuk menjalankan **aktiviti pertanian dan peruncitan dengan pulangan pendapatan mencecah antara RM8,000 hingga RM100,000 sebulan.**

Sejak PDL dilaksanakan pada tahun 2013, lebih **300 peluang pekerjaan telah berjaya diisi**, yang mana sejumlah besarnya adalah dipelopori oleh golongan belia kampung.

Rural Business Challenge (RBC)

Program RBC pula merupakan program yang berorientasikan keusahawanan menggunakan pendekatan pertandingan Rancangan Perniagaan (RP) bagi mencungkil bakat usahawan sebenar dalam kalangan belia untuk merealisasikan perancangan perniagaan kepada projek perniagaan di kawasan luar bandar.

Semenjak Kementerian Kemajuan Luar Bandar dan Wilayah (KKLW) menganjurkan Program RBC bermula tahun

2012, seramai **31 orang pemenang telah dipilih dan dianugerahkan dengan geran perniagaan keseluruhannya berjumlah RM26.15 juta**. Berikutan itu juga hampir 400 peluang pekerjaan baru sama ada secara langsung mahupun tidak langsung berjaya diwujudkan terutamanya kepada belia luar bandar dengan jumlah **pendapatan bulanan sebanyak RM700 hingga RM2,500 sebulan**. Di samping itu, **lebih 50 orang usahawan baru telah diwujudkan melalui pemenang-pemenang RBC ini**. Hal ini telah dapat membantu Kerajaan untuk menangani masalah pengangguran di luar bandar.